

Rodel dals uestgs da Cuira

Part 1: Dals origins al temp autmedieval

■ Il LIR cumpiglia in gronda part da las biografias dals uestgs da Cuira, e quai da l'entschatta da la cristianisaziun fin al temp modern. En ina pitschna seria duain vegnir preschents ils chaus da la diocesa en succesiun cronologica.

Asinio

Emprim uestg da Cuira attestà, menziunà en in document da l'uestg Abundantius da Com che approvescha l'avust/settember da l'onn 451 a Milaun ils conclus dal Concil da Chalcedon en ses agen num ed en quel dad Asinio (absent).

Immo Eberl

Valentianus

† 548. Uvestg da Cuira, enconuscent tras l'epitaf che ses nev Paulinus ha fatg engravar en si' onur. Ultra da sias virtids regarda l'inscripziun metrica a l'actività da Valentianus a favur dals basegnus e dals praschuniers, in'indicaziun che vegn considerata sco il reflex da las tribulaziuns, en las qualas sa chattava la Rezia en il Gavel tschientaner, avant ch'ella è vegnida sut il domini francon. Il sistem da dataziun da l'epitaf mussa in'influenza taliana. Sche Paulinus, attestà sco uestg da Cuira, è identic cun il nev da Valentianus, sa tractà d'in bel exempel da transmissiun da la pussanza episcopala entaifer la medema famiglia.

Eric Chevalley

Tello

Uvestg da Cuira enturn il 759–765. Derivant da la famiglia dals Zacones, figl dal preses Victor e da Theusinda. Tello è eventualmain vegnì educà a la claustra da Mustér. Tenor la Vita da Gallus da Walahfrid Strabo ha Tello intermedià il 759 en il conflict tranter la claustra da Son Gagl e l'uestg Sidonius da Constanza. Ultra da quai ha Tello era cunsignà l'onn 762 la lia d'uraziun, conclusida a la Sinoda dad Attigny (Ardenes). En in document redigì il 15 da december 765 sco *donatio post obitum*, enconuscent sco il «Testament da Tello», ha Tello legà a la claustra da Mustér vasts possess. Sco ses

successurs Constantius e Remedius, ha Tello probablmain uni l'uffizi spiritural da l'uestg cun quel secular dal preses.

Martin Hannes Graf

Constantius

Uvestg da Cuira, ca. 773, attestà en in sulet document da Carl il Grond che menziunescha l'uestg Constantius sco rector da la Currezia, reaffirmescha l'urden giuridic curretic e metta ils Rets, resalvà lur fidaivladad, sut sia proteccziun. Sco ses antecessurs possedeve Constantius uschia la suprema e cumplaina pussanza seculara ed ecclesiastica sur la Currezia. Cun quest document ha Carl il Grond fatg in emprim pass per reintegrar la Currezia en il domini francon. En ina brev a Carl il Grond ha l'avat da Murbach accusà l'uestg da Cuira, probablmain Constantius, d'enguladitsch.

David Blanck

Remedius

† 27 da zercladur 805/806 (eventualmain era pir l'onn 820). Remedius derivava probablmain dal circulo da la curt francona. In indizi è sia relaziun amicala cun Alkuin, il famus scienzià anglosaxon a la curt da Carl il Grond. Enturn l'onn 800 era Remedius uestg da Cuira ed exercitava, sco ses antecessurs, a medem mument il domini secular ed ecclesiastic. Tenor ina charta dad Alkuin era l'uestg Remedius responsabel per la proteccziun da las vias en sia patria (vul dir la Currezia) sco era per ils dazis sin ils pass ed en stretgas da vals; el presidiava la dretgira dal pajais ed ha laschà rediger il «Capitula Remedii», numnads suenter el e creads or d'in basegn pratic da la vita resp. da l'instrucziun da dretg. Quests decreti e l'uschenumna «Sacramentarium da Remedius» («Sacramentarium Gelasianum»), èn vegnids redigids probablmain en il scriptori episcopal a Cuira enturn l'onn 800 en minusclas reticas. Remedius vala medemmain sco autor dal program iconografic da la pictura carolingica applittgada en la baselgia claustrala da Müstair cun scenas dal Vegl Testament (oravant



L'anteriura baselgia sepulcrala dals uestgs da Cuira, Son Steffan, è vegnida consecrada d'in dals antecessurs dad Asinio.

Foto P. DE JONG

tut da la vita da David) e dal Nov Testament (da la vita da Jesus e dals apostels).

Ursus Brunold

Verendarius

Documentà tranter ils onns 836 e 842 sco uestg da Cuira. Verendarius era in fervent defensur da l'unitad imperiala francona. Perquai ha Ludwig il Pietus affirmà ad el ils bains en l'Alsazia e Lothar I ha regalà las baselgas a Sur ed en il Scanverg a la cella a Serris sper Flums. Verendarius aveva fundà questa cella per cumpensar Faveras ch'era sa distanzia da l'uestgieu. Anc il 842 ha Verendarius participà a la Sinoda a Milaun. L'onn 843, cura ch'il retg ostrofranc Ludwig il Tudestg è sa stabilì en la Rezia e che l'uestgieu da Cuira è vegnì attribui definitivamain a l'archuestgieu da Magonza, ha Verendarius probablmain stui bandunar sia sedia.

Carl Pfaff

Theodolf

Suenter si'entrada en uffizi sco uestg da Cuira tranter il settember da l'onn 887 ed ils 22 da schaner 888, ha Theodolf prendì part a la Sinoda da Magonza dal 888 ed a quella da Tribur (Trebur sper Magonza) dal 895. L'onn 898 è el stà preschent a la consecraziun da la claustra da S. Emmeram a Regensburg tras il papa Formosus. Il retg Arnulf duai avair delegà Theodolf ad Arles a confermar la tscherna dal retg Ludwig il Tudestg. L'onn 903 è Theodolf attestà a la curt da Forchheim, il 913 a quella da Strassburg. L'onn 912 ha il retg Konrad I concedì ad el il plainpudair d'inquisiziun.

Immo Eberl

Hartpert [Hartbert]

† 6 da schaner probablmain il 971/72. Attestà il 929 a Turig, il 930 sco plevon a Ramosch e Sent, il 937 sco spiritural privat dal duca Hermann I da la Svevia ed il 947 sco avat d'Ellwangen. Il 951 è Hartpert documentà per l'emprima giada sco uestg da Cuira. Davent da Pavia è el vegnì delegà, ensem cun l'archuestg da Magonza, a Roma per tractar l'encuraziun dad Otto I al retg d'Italia. Confident dad Otto I ch'ha concedì ad el en il rom da la politica imperiala ed ecclesiastica ottonica vasts territoris e privilegis lung il corridor retic nord-sid per garantir la controlla dals pass alpini vers l'Italia: las entradas fiscalas dal contadi da Cuira (951), la duana da Cuira (952), bains en l'Alsazia (952/53), la *curtis* roiala da Zezras (955), la mesa *civitas* da Cuira ed il dretg da batter munaida (958), la curtis roiala da Cuira ed ils dreths fiscalis relatifs (960), intginas baselgas, ils dreths comitals e la duana en la Bergaglia. Questas donaziuns han mess la basa da la suveranità da l'uestg sur la citad da Cuira e da sia pussanza temporara en las regiuns dals pass retics.

Veronika Feller-Vest

Hildibald

Attestà per l'emprima giada il 972/75, l'ultima giada il 988. Uvestg da Cuira

972–88 (il document dal 972 è eventualmain antidatà). Il 972 ha Otto I decidì ina disputa cun Arnold, signur da Schänis, per il bain roial (*curtis*) a Zezras, en favur da Hildibald. Il 976 ha Otto II renovà il contract da barat stipulà il 960 tranter Otto I e l'uestg Hartpert ed il 980 ha el concedì a Hildibald ils dreths da pedagi a la punt sur la Maira a Clavenna. Il 988 ha Otto III confermà al chapitel catedral las donaziuns da ses predecessurs sco era l'immunitad e la proteccziun roiala.

Veronika Feller-Vest

Thietmar

Attestà dal 1040 fin il 1070 sco uestg da Cuira, † 29 da schaner 1070. Thietmar ha participà a la sepultura da l'imperatura Gisela a Speyer il 1043. Mess imperial en l'Italia il 1046/47, il 1049 e (probablmain en la suite da papa Leo IX) il 1053. Il 1057 è Thietmar stà preschent a l'investitura da l'uestg Gundhar von Eichstätt a Speyer. Il 1050 ha el obtegnì dal retg Heinrich III guauds serrads da la curuna, situads tranter Grabs e Buchs e dad omaduas varts dal Rain da la chavorgia da Versomi fin a la Landquart ed a la Tamina. Il 1040 ed il 1061 è el sa laschà confermar dal retg Heinrich III resp. da Heinrich IV privilegis e possess dal chapitel catedral da Cuira.

Veronika Feller-Vest

Ulrich von Tarasp

Attestà per l'emprima giada il 1089, † 30 da fanadur 1096 a Cuira. L'identificaziun cun il prevost dal chapitel catedral, che cumpara senza num en las annalas da Berthold von Reichenau, deriva d'ina tradiziun dal temp modern e na sa lascha betg cumprovar tras funtaunas primaras. Il 1089 è Ulrich von Tarasp vegnì numnà – sin basa d'in mandat papal – tras l'uestg Gebhard III da Constanza uestg da Cuira. El è stà participà, ensem cun ses trais frars, a la fundaziun da la claustra da Scuol.

Veronika Feller-Vest

Wido

† 17/18 da matg 1122 en la claustra da Petershausen en vischinanza da Constanza. Canon da Augsburg, uestg da Cuira 1096–1122. Datiers dals gregorian, ha el tgirà ina corrispondenza intensiva cun il papas Paschalis II e Calixt II, ma era stabilì contacts cun il retg Heinrich V. A partir dal 1110 è Wido vegnì engaschà dal papa sco mediator en affars en la Germania dal Sid, uschia per exempel a l'ocasiun da l'instituziun dad Ulrich von Dillingen sco uestg da Constanza il 1111 u en la cuntraversa tranter Rudolf von Homburg, uestg da Basilea, e la claustra da Faveras davart il status claustral. Enturn il 1120 vuleva Wido resignar, il papa ha però refusà la dimonda. Wido ha fundà l'ospizi sin il Pass dal Set ch'è documentà per l'emprima giada il 1186.

Veronika Feller-Vest

Konrad von Biberegg

Attestà tranter il 1123 ed il 1144, † enturn il 1145. Descendent da la famiglia

dals conts svevais von Biberegg. Uvestg da Cuira 1123–44. Fidaivel a l'imperatur, è Konrad von Biberegg stà savens preschent a la curt da Heinrich V, da Lothar III e da Konrad III. Il 1131 ha el consecrà la claustra (reconstruida) da S. Maria a Scuol. Tras l'acquist dal signuradi dals conts von Gamertingen en Engiadin'Ota il 1137/39, ha el rinforzà l'influenza dals uestgs da Cuira en la regiun dals pass grischuns. Tenor ina tradiziun dal 16avel tschientaner ha el clamà a S. Gliezi a Cuira premonstratens da la claustra da Roggenburg (Baviera), fundada da ses frars.

Adelgott (sontg)

Attestà per l'emprim giada il 1151, † 3 d'october 1160. Pader cisterziens da Clairvaux (Champagne), scolar da Bernard da Clairvaux. Uvestg da Cuira 1151–60. Pliras giadas en l'escorta dal retg Conrad III e da l'imperatur Friedrich I. Reorganisatur da l'uestgieu e renovatur da la vita religiosa. Adelgott ha reformà las claustras da Müstair, Casaz e Schänis e reglà lur relaziuns economicas. Il 1154 ha el confidà al convent da S. Gliezi l'ospital da S. Martin da Cuira, il possess da la claustra da mungias da Mistail, schliada tranter il 1096 ed il 1154, e la surveglianza sur Casaz. Il 1160 ha el consecrà la cripta da la claustra da Mariamunt, transferida da Scuol en il Vnuost. Il possess dal chapitel catedral en il Vnuost, l'Engiadina Bassa, il Surses e la Bergaglia è vegnì augmentà il 1160 considerablmain tras ina donaziun dad Ulrich III de Tarasp. Venerà sco sontg en l'uestgieu da Cuira dapi il 17avel tschientaner.

Veronika Feller-Vest

Egino

Attestà 1154–70. Prevost dal chapitel catedral da Cuira 1154–60, uestg da Cuira 1163–70 (ordinà il 1167). Oriund dal'Engiadina Bassa u dal Vnuost, ha Egino consolidà la posiziun da l'uestgieu en la Val Müstair ed en il Vnuost cun donaziuns obtegnidas dals signurs de Tarasp e cun l'intermediaziun (1164/67) en ina disputa tranter Ulrich III e Gebhard de Tarasp concernent la prefectura da la claustra da Mariamunt (Vnuost). Aderent da l'imperatur Friedrich I, ha el surdà il 1170 la prefectura da Cuira al figl da Friedrich I, il duca Friedrich von Schwaben ch'ha deliberà Egino persunter dals servetschs imperials ed a la curt imperiala.

Veronika Feller-Vest

Ulrich von Tegerfelden

Attestà per l'emprima giada il 1162, † 12 d'avrigl tranter il 1200 ed il 1204 a Son Gagl. Descendent da la famiglia da baruns Tegerfelden da l'Argovia, a la quala appartegnava era Konrad, uestg da Constanza. Prevost 1166–67, avat da la claustra da Son Gagl 1167–99. Uvestg da Cuira 1170–79, senza renunziar al titul d'avat. Ulrich von Tegerfelden, che n'è probablmain mai vegnì consecrà uestg, ha inizià a Cuira la nova construcziun da la catedral, il chor da la quala è vegnì consecrà il 1178 tras l'uestg Berno von Mecklenburg-Schwerin. Il 1179 ha Ulrich von Tegerfelden renunzià a l'uestgieu a chaschun dal Terz Concil Lateran che scumandava la cumulaziun d'uffizis. Il 1199 ha el era resignà sco avat.

Veronika Feller-Vest

Regenza	Uvestg	Regenza	Uvestg
Uvestgs avant la Refurmaziun		Regenza	Uvestg
	Puricius	1290/91 – 1298	Berthold II von Heiligenberg
	Claudianus	1298 – 1321	Siegfried von Gelnhausen
	Ursicin	1322 – 1325	Rudolf II von Montfort-Feldkirch
	Sedonius	1325 – 1331	Johann I Pfefferhard
	Eddo	1331 – 1355	Ulrich V Ribi
	Leuthardus	1356 – 1368	Peter I Gelyto
	Othcarius	1368 – 1376	Friedrich II von Erdingen
	Notingus	1376 – 1388	Johannes II Ministri
		1388 – 1416	Hartmann II von Werdenberg-Sargans
451	Asinio	1416 – 1418	Johannes III Ambundii
ca. 548	Valentianus	1418 – 1440	Johannes IV Naso
	Paulinus (?)	1440 – 1441	Konrad von Rechberg
	Theodoros (?)	1441 – 1456	Heinrich von Hewan
614	Victor I	1456	Antonius de Tosabecis
	Paschalis	(1453) – 1458	Leonhard Wismair
	Victor II	1458 – 1491	Ortlieb von Brandis
	Vigilius	1491 – 1505	Heinrich von Hewan
ca. 759 – 765	Tello	1505(?) – 1541	Paul Ziegler
ca. 773	Constantius		
ca. 800	Remedius		
	Victor III		
836 – 842	Verendarius	Uvestgs dal temp modern tempriv	
849 – 868	Esso	1505(?) – 1541	Paul Ziegler
	Ruodharius	1541 – 1549	Lucius Iter
	Theodolf	1549 – 1565	Thomas Planta
887/88 – 913	Waldo	1565 – 1581	Beatus a Porta
920 – 949 (?)	Hartpert	1565 – 1566	Bartholomäus von Salis
951 – 971/72	Hildibald	1579	Joachim Opser
ca. 972 – 988	Ulrich I	1581 – 1601	Peter de Rascher
1000 – 1024	Repertus	1601 – 1627	Johann V Flugi d'Aspermont
	Hartmann I	1627 – 1635	Joseph Mohr
	Thietmar	1636 – 1661	Johann VI Flugi d'Aspermont
	Heinrich I	1661 – 1692	Ulrich VI de Mont
1080 – 1088	Norbart	1692 – 1728	Ulrich VII von Federspiel
1089 – 1096	Ulrich von Tarasp	1728 – 1754	Joseph Benedikt von Rost
1096 – 1122	Wido	1755 – 1777	Johann Baptist Anton von Federspiel
1123 – 1144	Konrad von Biberegg	1777 – 1793	Dionys von Rost
ca. 1145 – 1150	Konrad II	1794 – 1833	Karl Rudolf Buol von Schauenstein
1151 – 1160	Adelgott		
1163 – 1170	Egino	Uvestgs dapi il 19. tschientaner	
1170 – 1179	Ulrich von Tegerfelden	1834 – 1844	Johann Georg Bossi
1179 – 1180	Bruno	1844 – 1859	Kaspar de Carl von Hohenbalken
1180 – 1193/94	Heinrich II	1859 – 1876	Nikolaus Franz Florentini
1194 – 1209	Reinher de Torre	1877 – 1879	Kaspar Willi
1209 – 1221	Arnold von Matsch	1879 – 1888	Franz Constantin Rampa
1224 – 1226	Rudolf von Güttingen	1888 – 1908	Johannes Fidelis Battaglia
1228 – 1233	Berchtoald I	1908 – 1932	Georgius Schmid von Grüneck
1233/34 – 1237	Ulrich IV von Kyburg	1932 – 1941	Luregn Mathias Vincenz
1237 – 1251	Volkard von Neuburg	1941 – 1962	Christianus Caminada
1251 – 1272	Heinrich III von Montfort	1962 – 1990	Johannes Vonderach
1273 – 1282	Konrad III de Belmont	1990 – 1997	Wolfgang Haas
1282 – 1290	Friedrich I von Montfort	1998 – 2007	Armedée Grab
		2007 –	Vitus Huonder

Funtauna: HS

Survista complessiva dals uestgs da Cuira.

Lexicon Istoric Retic

Il LIR cumpiglia bundant 3100 artigels (geografics, tematics, artigels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiuon online: www.e-lir.ch; versiuon stampada: www.casanova.ch u en mintga libreria.